

दिनांक 19.07.2025
 समय: 18.45 बजे
 आकाशवाणी जयपुर-अजमेर
 प्रादेशिक समाचार

- प्रदेश मांय केई ठोड़ां घणी भारी बिरखा ऊं जिंदगी माथे असर पड़्यो-नैनवा, मेड़ता अर दूणी मांय सब ऊं बत्तो 23-23 सेंटीमीटर पाणी बरस्यो
- मुख्यमंत्री भजनलाल शर्मा यमुना नदी मांय पाणी आवण रा हलकां मांय बंधा बणावण सारु 95 करोड़ रुपया मंजूर कीनां
- केन्द्रीय मंत्री डॉ. मनसुख मांडविया नौजवानां ऊं नशा ऊं दूर रेहवण री अपील कीनीं
- राज्य मांय साइबर अपराधां माथे काबू करण सारु पुलिस रा खास अभियानां अर जाग जगावण रा कार्यक्रमां रो असरं

राज्य मांय केई ठोड़ां भारी बारिश जदके कठे-कठे घणी भारी बिरखा व्ही हैं मौसम केन्द्र जयपुर रे मुजब लारला चौबीस 24 घंटां मांय बूंदी जिला रा नैनवा, नागौर जिला रा मेड़ता अर टोंक जिला रा दूणी मांय सब ऊं बत्तो 23-23 सेंटीमीटर पाणी बरस्यो प्रतापगढ़, धौलपुर, राजसमंद, दौसा अर जोधपुर जिलां मांय ई कठे-कठे 10-10 सेंटीमीटर ऊं बत्ती बारिश व्हीं जोरदार मेह ने ध्यान राखता थकां प्रशासन जनता ऊं तळावां, नदियां अर बंधां रा आरे-सारे रा हलकां मांय नी जावण री अपील कीनी हैं घणी बिरखा ऊं केई शहरां रा रिहायशी हलकां अर गांवां रा खेतां मांय पाणी भर ग्यों पाणी भरण रा हालात ने ध्यान राखता थकां बाड़मेर, झालावाड़, कोटा, बूंदी अर अजमेर री स्कूलां मांय छुट्टी रो ऐलाण कर दियो ज्यो हैं अजमेर जिला रा नसीराबाद, पीसांगन, पुष्कर, किशनगढ़, सरवाड़, अरांई अर भिनाय मांय जोरदार मेह बरस्यो म्हाणी अजमेर खबरनवीस बतायो के जिला रा केई बंधां अर तळावां माथे पाणी री रपट चाल रही हैं

विधानसभा अध्यक्ष वासुदेव देवनानी अजमेर मांय घणी बिरखा रा असर वाळा हलकां रो दौरा कीनीं शिक्षा मंत्री मदन दिलावर ई आज दूजा दिन कोटा रा रामगंज मंडी मांय बिरखा रा असर वाळा हलकां रो दौरा कर र नुकसाण रो जायजो लीनीं मौसम विभाग आज जोधपुर संभाग अर आरे-सारे रा हलकां मांय भारी बारिश रो रेड अलर्ट जारी कीनी हैं मौसम केन्द्र जयपुर रा निदेशक राधेश्याम शर्मा बतायो के राज्य रा ऊगणी हलकां मांय आज अर आतूणी हलकां मांय काल ऊं बारिश रो जोर कम पड़बा रा आसार हैं

मुख्यमंत्री भजनलाल शर्मा यमुना नदी मांय पाणी आवण रा हलका मांय बांध बणावण सारू राज्य री हिस्सेदारी रा तौर ऊं 95 करोड़ रुपये मंजूर किये हैं इण ऊं तैय बगत मांय प्रदेश रा शेखावाटी हलका ने पीवण अर पाणत सारू ज़रूरी पाणी मुहैया करायो जा सकेलां यमुना जल परियोजना ऊं चूरू, सीकर अर झुंझुनूं समेत आरे-सारे रा हलका मांय पाणी री पूर्ति तैय करी जा सकेलां यमुना नदी रा पाणी भरण रा हलका मांय हिमाचल प्रदेश अर उत्तराखंड मांय तीन खास बांध बणाया जा रह्या हैं फिलहाल लखवार अर रेणुकाजी बंधा रो काम चाल रह्यो हैं आं परियोजनावां माथे करीब 11 हजार 320 करोड़ रुपया रो खर्चो आवेला, जिण मांय ऊं राजस्थान री हिस्सेदारी करीब 215 करोड़ रुपया हैं

.....

राज्यपाल हरिभाऊ बागडे कह्यो है के स्कूल-कॉलेजां मांय विद्यार्थियां ने किताबी ज्ञान सागे जीवन व्यवहार री सीख ई देवणी चाहिजें श्री बागडे आज जयपुर मांय एक गैर-सरकारी स्वास्थ्य शोध संस्थान रा दीक्षांत समारोह मांय बोल रह्या हां राज्यपाल कह्यो के स्वास्थ्य प्रबंधन रा हलका मांय स्वास्थ्य सुबीता री क्वालिटी माथे खास ध्यान दियो जावणो चाहिजें वे कह्यो के प्रदेश रा सगळा विश्वविद्यालयां रो नेक एक्कीडेशन अर आला दर्जा री भणार्ई-लिखाई री गुणवत्ता माथे सरकार रो खास ध्यान हैं

.....

केन्द्रीय इलेक्ट्रॉनिक्स अर सूचना प्रौद्योगिकी मंत्री अश्विनी वैष्णव कह्यो है के विकसित भारत रो लक्ष्य हासिल करण सारू ज़रूरी तकनीकी आधार तेजी ऊं तैयार कर्यो जा रह्यो हैं आज हैदराबाद मांय व्ह्या एक जळसा मांय वे आस जतायी के देश री पहली बुलेट ट्रेन साल 2027 मांय चालण री उम्मीद हैं वे नौजवान पेशेवरों ऊं विश्व स्तर रा उत्पाद बणावण बाबत् कह्यो

.....

केन्द्रीय युवा कार्यक्रम अर खेल मंत्री डॉ. मनसुख मांडविया नौजवानां ऊं नशा मुक्त, मज़बूत अर संस्कारी बणबा री अपील कीनी हैं वे आज वाराणसी मांय राख्यी ज्या **युवा आध्यात्मिक शिखर सम्मेलन** रा उद्घाटन सत्र मांय बोल रह्या हां श्री मांडविया कह्यो के विकसित भारत रो सपनो सांचो करण सारू नशा ऊं दूर रेहवणो व्हेलां

.....

कार्यक्रम मांय मौजूद केन्द्रीय सामाजिक न्याय अर अधिकारिता मंत्री डॉ. विरेन्द्र कुमार कह्यो के नशा सामाजिक चुनौती बणतो जा रह्यो हैं वे कह्यो के नौजवान देश रो भविष्य है, ज्यां ने खुद री ताकत पिछाण र वां रो सही तरीका ऊं इस्तेमाल करणो चाहिजें युवा कार्यक्रम अर खेल मंत्रालय री ओर ऊं **विकसित भारत के लिए नशा मुक्त युवा** मुद्दा माथे दो दिन रो शिखर सम्मेलन राख्यो जा रह्यो हैं

.....

राज्य मांय साइबर अपराधियां रे खिलाफ पुलिस कानी ऊं चलाया जा रह्या खास अभियानां अर जाग जगावण रा कार्यक्रमां ऊं साइबर अपराधां माथे असरदार तरीका ऊं काबू कर्यो जा रह्यो हैं साइबर अपराध रोकण रो काम देख रह्या एस.पी. शान्तनु कुमार सिंह बतायो के साइबर धोखाधड़ी ऊं जुड़ी रकम मांय कमी अर पाछी हासिल करी जावण वाळी रकम मांय बधोतरी दर्ज करीजी हैं वे बतायो के लारला साल फ्रीज करी ज्यी 43 करोड़ रुपया री रकम री तुलना मांय ई साल आ रकम बध र 66 करोड़ रुपया ऊं बत्ती व्हे गयी हैं श्री सिंह बतायो के साल 2024 रे मुकाबले 2025 रा सरुआती छह महीनां मांय साइबर अपराधां री जद मांय आयी कुल रकम मांय 26 करोड़ रुपया री कमी आई है, जदके बैंक खातां मांय रोकी ज्यी अर फ्रीज करी ज्यी रकम मांय करीब 23 करोड़ रुपया री बधोतरी व्ही हैं श्री शान्तनु कुमार जनता ऊं साइबर धोखाधड़ी व्हेवण री सूरत मांय इण री जाणकारी हेल्पलाइन नम्बर 1930 माथे देवण री अपील कीनी हैं

.....

मानव तस्करी रा बारा मांय जयपुर मांय व्ह्यो दो दिन रो राज्य स्तर रो सम्मेलन आज पूरो व्ह्यो ई दौरान जाणकार कह्यो के जागरुक समाज अर तालमेल सागे भेळी कोशिशों ऊं मानव तस्करी रोकी

जा सके हैं राजस्थान पुलिस मानव तस्करी रे खिलाफ अभियान चला र पीड़ितां ने पाछा घर पूगावण रो अभियान चला रही हैं

.....

वर्ल्ड पुलिस अर फायर गेम्स 2025 मांय राजस्थान पुलिस रा खिलाड़ी 29 तमगा हासिल कर र देश अर प्रदेश रो नाम रोशन कीनो हैं अमेरिका मांय व्ह्या आं खेलां मांय राजस्थान पुलिस रा खिलाड़ी सोना रा 17, चांदी रा 5 अर कांसा रा 7 तमगा जीत्यां

.....

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम **मन की बात** मांय 27 जुलाई ने श्रोतावां ऊं जुड़ेलां आ ई रेडियो कार्यक्रम री 124वीं कड़ी व्हेलां ई कार्यक्रम सारू आप ई 25 जुलाई ताई सुझाव भेज सको हों प्रधानमंत्री ई कार्यक्रम रे मार्फत देश-परदेश रा श्रोतावां सागे विचार साझा करे हैं प्रधानमंत्री कानी ऊं अक्टूबर 2014 ऊं सरू करी ज्यो मन की बात कार्यक्रम क्षेत्रीय, भाषायी अर भौगोलिक सरहदां ने पार करता थकां संबोधन रो अभूतपूर्व जरियो बण गयो हैं बात चाहे, स्वच्छ भारत मिशन री हो, योग री, महिलावां ने मजबूत बणावण री अर अंतरिक्ष मांय इतिहास बणावण री, ओ कार्यक्रम बहुआयामी साबित व्ह्यो हैं आकाशवाणी अर दूरदर्शन रा पूरा नेटवर्क सागे अब ओटीटी प्लेटफॉर्म वेव्ज माथे ई इण री लाइव स्ट्रीमिंग करी जा रही हैं हिंदी सागे क्षेत्रीय भाषावां मांय ई प्रसारित कर्या जावण वाळा ई कार्यक्रम मांय सामाजिक, सांस्कृतिक अर देश बणवण ऊं जुड्या न्यारा-न्यारा मुद्दां माथे जनता री राय ई शामिल करी जावे हैं ई दौरान प्रधानमंत्री न्यारा-न्यारा मुद्दां अर चुनौतियां माथे चर्चा सागे देश ही उपलब्धियां रो ई जिकर करे हैं ई सागे ई विशेष हलका मांय खास योगदान देवण वाळां रा काम री सराहवणा ई करे हैं

.....

संसद रो पावस सत्र 21 जुलाई, सोमवार ऊं सरू व्हेलां इण ऊं पैली काल केन्द्र सरकार सगळी सियासी पार्टियां री मीटिंग बुलायी हैं ई दौरान सरकार संसद रा दोन्यू सदनां मांय काम-काज ठीक तरीका ऊं चलावण बाबत् सगळी सियासी पार्टियां ऊं चर्चा करेलां संसद रो मॉनसून सत्र 21 अगस्त ताई चालेलां ई दौरान केई खास बिलां माथे चर्चा व्हेवण रा आसार हैं

.....